

9. október 2019

Samráðsgátt

Varðar: Drög að frumvarpi til laga um breytingu á lögum um heilbrigðisþjónustu nr. 40/2007. Mál nr. 223/2019.

Til þess sem málið varðar.

Vísindaráð Landspítala er til ráðgjafar um vísindastarf á sjúkrahúsinu. Það á við um vísindastefnu sjúkrahússins gagnvart háskólastofnunum og einkafyrirtækjum hér á landi eða í öðrum löndum. Ráðið þakkar tækifærið til að veita umsögn um drög að frumvarpi um breytingar á heilbrigðisþjónustu. Vísindaráðið takmarkar umsögn sína við starfssvið þess, það er vísindastarf á Landspítalanum.

Í drögum er gert ráð fyrir að 20. gr. í núverandi lögum falli niður og í stað komi eftirfarandi liður a í 7. gr. með eftirfarandi stuttri málsgrein m.a. um vísindi:

*Landspítali er aðalsjúkrahús landsins og háskólasjúkrahús. Á Landspítala er veitt annars og þriðja stigs heilbrigðisþjónusta m.a. á göngu- og dagdeildum. Hlutverk Landspítala er m.a. að annast kennslu í grunn- og framhaldsnámi, gera fagfólki kleift að sinna fræðastörfum við háskóla auk þess að veita aðstöðu til vísindarannsókna og að starfrækja blóðbanka.*

*Ráðherra skal í reglugerð kveða nánar á um hlutverk og starfsemi Landspítala og þá heilbrigðisþjónustu sem þar skal veitt.*

Vísindaráðið telur þetta orðalag óheppilegt og í raun misvísandi. Af því má ráða að hlutverk Landspítalans sé ekki lengur að stunda vísindarannsóknir á heilbrigðisviði á eigin vegum heldur styðja aðra í því. Ekki er um slíka breytingu rætt í greinargerð og því er þessi skilningur væntanlega ekki tilgangurinn með breytingunni. Það myndi líka vera í andstöðu við einn af hornsteinum nýsamþykkrar vísindastefnu spítalans, um að styðja við öflugt vísindastarf á vegum Landspítalans.

Vísindaráð telur 20. gr. ágæta eins og hún er í núverandi lögum og missir að henni. Sérstaklega er nauðsynlegt að hafa inni málgrein um að hlutverk Landspítalans sé að stunda vísindarannsóknir á heilbrigðisviði og að veita háskólamenntuðum starfsmönnum sérmenntun í heilbrigðisgreinum en slíkt nám er oft að hluta byggt á vísindapjálfun. Ef vilji er til að fella 20. gr. út gerir Vísindaráð að tillögu að lið a í 7. gr. verið breytt og hljóði:

*Landspítali er aðalsjúkrahús landsins og háskólasjúkrahús. Hlutverk Landspítala er þríþætt. Á Landspítala er veitt annars og þriðja stigs heilbrigðisþjónusta m.a. á göngu- og dagdeildum og með því að starfrækja blóðbanka. Landspítali annast kennslu í grunn- og framhaldsnámi og veitir háskólamenntuðum starfsmönnum sérmenntun í heilbrigðisgreinum. Landspítali stundar vísindarannsóknir á heilbrigðissviði, gerir fagfólki kleift að sinna fræðastörfum við háskóla auk þess að veita aðstöðu til vísindarannsókna.*

*Ráðherra skal í reglugerð kveða nánar á um hlutverk og starfsemi Landspítala og þá heilbrigðisþjónustu sem þar skal veitt.*

Sé þessi seinni leið valin er mikilvægt að Landspítali geti áfram átt aðild að rannsóknar- og þróunarfyrirtækjum eins og leyft er í 20 gr. hvort sem þetta er tekið fram í þessum lögum eða öðrum.

Virðingarfyllt,

Vísindaráð Landspítala